



## Cuors dalla veta da nossa cara mumma

### Catrina Soliva-Jacomet

(04.01.1923 - 20.01.2012)

Nossa mumma, tatta e basatta, la tatta Catrina ni la Catrina dil Bruno sco ella vegneva numnada, ei naschida ils 4 da schaner 1923 en la biala ucliva da Mumpé Medel. El ravugl d'ina gronda famiglia purila ha ella passentau ina legreivla affonza. Els menaschis purils da lezs temps havevan tuts confamiliars da segidar e quei ei era stau aschia tier nossa mumma. Sper tut la biara lavur e truscha da mintgadi era la veta religiosa da gronda impurtonza. Aschia veva ei num da separicipar als survetschs divins, che vegnevan per gronda part celebrai a Mustér ella baselgia parochiala. Quei muntava adina in liung e stentus viadi a pei e quei da tutt'aura. Quella tenuta religiosa ha formau nossa mumma per veta duronta. Quei fatg ha dau ad ella la forza e curascha da purtar tut las cruschs, che Dieus il Tutpussent ha disponiu per ella.

Suenter haver frequentau las scolas en vischnauba eis ella serendida in pèr onns ella bassa per fadigar il paun jester ed emprender il lunghatg tudestg.

Igl onn 1948 marida nossa mumma il giuven Tuatschin Bruno Soliva. Ils consorts secasan a Sedrun silla Spinatscha. La ventireivla lètg vegn benedida cun endisch affons. Ins sa bein s'imaginar tgei lavur e travaglia l'educaziun ed il nutriment d'ina aschi gronda famiglia ha caschunau als consorts. Sper la gronda lavur el tenercasa ha ella duront in pèr onns lavau il resti da letg dils luvrers, ch'eran fatschentai sils plazzals da bagheggiar dils lags da fermada da Nalps e Curnera. Cun ils daners fadigai cumprava ella mintgamai per nus il resti da dumengias. Oz astgein nus constatar, ch'ella ha possibilitau a nus, malgrad las mudestas relaziuns da gliez temps, ina ventireivla affonza. Per quei e per tut igl auer bien prestau schein nus tuts a Ti cara mumma in resentiu e sincer *Engraziel fetg e Dieus paghi*.

Era per ils ulteriurs confamiliars eis ella stada ina buna sira, tatta e basata. Ella ha adina giu escha aviarta per tuts e selegrava da mintga viseta e puppergnava quellas sin tutta moda e maniera. In grond e *cordial engraziament* persuenter.

Duront sia liunga veta ha nossa cara mumma giu da purtar bein enqual crusch. Talas fridas ha ella supportau cun ina tenuta admirabla, cun gronda pazienzia e cun ina ferventa cardientscha ellas disposiziuns divinas.

Igl onn 1970 ei il consort Bruno vegnius taccaus d'ina greva e maligna malsogna dalla quala el ha stuiu pitir entochen la fin. Cun bien quita e gronda carezia ha nossa cara mumma tgirau il car consort e bab entochen sia mort igl onn 1989.

Ina ulteriura gronda e greva crusch ch'ella ha giu da purtar, ei stada la mort anetga e nunspitgada dil car fegl Bruno, caschunada d'ina allergia muort la narcosa duront ina sempla operaziun.

Ils 22 da settember 2011 ha in sgarscheivel incendi destruiu nossa casa paterna, nua che nossa mumma haveva passentau biabein 63 onns da sia liunga veta. Tut surura e mo cun il resti ch'ella purtava si dies ha ella stuiu badunar la casa e serender en la habitaziun da vacanzas dil fegl Emil. Mo era quei schabetg ha buca pudiu stermentar ella. Paucs dis avon sia mort fageva ella quitaus, che las grondas nevadas savessien retardar l'entschatta dallas lavurs da construcziun per la casa nova.

Mardis, ils 17 da schaner 2012 ha nossa cara mumma stuiu serender el spital a Glion per ina controlla. La notg sin la mesjamna han ins anflau ella senza schientscha en consequenza d'ina daguota dil tschurvi.

Il venderdis notg ha ella rendiu sia olma a Dieus il Tutpusent, bein provedida cun ils sontgissims sacraments dalla baselgia.

Aschia ei in grond giavisch da nossa cara mumma ius en vigur. Ella ha adina giavischau che Dieus clomi ella tier el avon ch'ella daventi in cass da tgira e caschuni als auters lavur. La sera avon che murir ha ella detg allas tgirunzas. „Vus mo mirei da quella dunna cheu sper mei. Quella ei mender vidlunder ch'jeu. Jeu vegnel schon da seregular memezza.

Per la finizun vonza ei aunc d'engraziar als fargliuns ed all'entira famiglia per tut il bien prestau alla mumma duront sia liunga veta e duront il cuort temps da malsogna. In special engraziament mereta denton nies

frar Silvio, ch'ei vivius duront biars onns ensemens cun nossa mumma e ha cheutras possibilitau ad ella da passentar il temps da vegliadetgna a casia. Mo era a tut ils auters, che han fatg dil bien cun la cara defuncta duront sia liunga vetalein nus engraziar da cor.

Nus engraziein era cordialmein a Sur Reto Nay per sia assistenza spirituala. Nossa mumma ha adina appreziav zun fetg la ordvart buna relaziun cun nies augsegner, Sur Reto.

In engraziel fetg admettein nus era a Sur Giusep Cathomas ed a ses concelebrants per il survetsch divin da sepultura.

Era a tut quels ch'ein segidai sin ina moda u l'autra tier il survetsch divin engraziein nus da tut cor.

*Segner, dai a nossa cara mumma il ruaus perpeten*

*La glisch perpetna sclareschi ad ella*

*Segner, lai ruaussar ella en pasch*

Marcel Soliva